



БОЛОВСРОЛЫН ҮНЭЛГЭЭНИЙ ТӨВИЙН ЗАХИРЛЫН ТУШААЛ

2022 оны 02 сарын 15 өдөр

Дугаар A105

Улаанбаатар хот

Элсэлтийн ерөнхий шалгалтын журам батлах тухай

Монгол Улсын Засгийн Газрын “Монгол хэлбичгийн боловсролыг сайжруулах арга хэмжээний тухай” 2013 оны 37 дугаар тогтоолын 1 дүгээр хэсгийн 1.2 дахь заалт, Боловсрол, шинжлэх ухааны сайдын “Журамд нэмэлт өөрчлөлт оруулах тухай” 2022 оны А/47 дүгээр тушаалын 2 дугаар хэсгийн 2.3, 2.5 дахь заалт, Боловсрол, шинжлэх ухааны сайдын 2022 оны А/20 дугаар тушаалаар батлагдсан “Боловсролын үнэлгээний байгууллагын дүрэм”-ийн 3 дугаар зүйлийн 3.1.8, 4 дүгээр зүйлийн 4.5.3 дахь заалтыг тус тус үндэслэн ТУШААХ нь:

1. “2022 оны Элсэлтийн ерөнхий шалгалтын журам”-ыг хавсралтаар баталсугай.

2. Батлагдсан журмыг элсэлтийн ерөнхий шалгалтын зохион байгуулалтын үйл ажиллагаанд мөрдөж ажиллахыг Үндэсний болон олон улсын үнэлгээний хэлтсийн дарга /М.Болдсайхан/, Мэдээллийн технологийн хэлтсийн дарга /Э.Цэрэнцоодол/, байгууллагын цахим хуудас /www.eec.mn/-д байршуулахыг Хэвлэл, мэдээлэл, сурталчилгаа хариуцсан мэргэжилтэн /Б.Цэрэннадмид/, хэрэгжилтэд хяналт тавьж ажиллахыг Удирдлагын хэлтсийн дарга /З.Дайриймаа/ нарт тус тус үүрэг болгосугай.


3. Журам батлагдсантай холбогдуулан Боловсролын үнэлгээний төвийн захирлын “Элсэлтийн ерөнхий шалгалтын журам батлах тухай” 2021 оны А/10 дугаар тушаалыг хүчингүй болсонд тооцсугай.

ЗАХИРЛЫН ҮҮРЭГ ГҮЙЦЭТГЭГЧ

Л.ГАНБАТ



14110 00000890



2022 ОНЫ ЭЛСЭЛТИЙН ЕРӨНХИЙ ШАЛГАЛТЫН ЖУРАМ

Нэг. Нийтлэг үндэслэл

- 1.1. Энэхүү журмаар Монгол Улсын хэмжээнд их, дээд сургуульд элсэгчдийн мэдлэг, чадварын түвшинг тогтоох зорилго бүхий Элсэлтийн ерөнхий шалгалт /цаашид ЭШ/ гэх, эх хэлний боловсролын чанар, хэрэглээ, иргэдийн харилцааны соёл, эх хэлний дархлааны түвшинг тогтоох, сайжруулах зорилго бүхий Монгол хэл бичгийн шалгалт /цаашид МХБШ гэх/-ыг зохион байгуулж явуулахтай холбогдсон харилцааг зохицуулна.
- 1.2. Их, дээд сургуульд элсэгчдээс авах ЭШ-ыг зохион байгуулахад БШУ-ны сайдын 2013 оны А/79 дүгээр тушаалаар батлагдсан “Оюутан элсүүлэх журам” /БСШУ-ны сайдын 2016 оны А/87 тоот тушаалаар нэмэлт өөрчлөлт орсон/ болон холбогдох бусад эрх зүйн актыг дагаж мөрдөнө.
- 1.3. Олон улсын шалгалтын үнэлгээг Монгол улсын ЭШ-ын үнэлгээтэй дүйцүүлэхэд БШУ-ны сайдын 2021 оны А/347 дугаар тушаалаар батлагдсан журмыг баримтална.
- 1.4. ЭШ-ыг 2022 онд бүрэн дунд боловсрол эзэмшсэн иргэн /цаашид энэ онд төгссөн шалгуулагч гэх/, 2022 оноос өмнө бүрэн дунд боловсрол эзэмшсэн болон түүнээс дээш боловсролтой иргэн /цаашид өмнөх онд төгссөн шалгуулагч гэх/ өгнө.
- 1.5. Их, дээд сургуульд элсэн суралцахаар ЭШ-д бүртгүүлсэн шалгуулагч нь Монгол Улсын Засгийн Газрын 37 дугаар тогтоол, БШУ-ны сайдын 2013 оны А/79 дүгээр тушаалаар батлагдсан “Оюутан элсүүлэх журам”-ын дагуу МХБШ-д заавал хамрагдсан байна.
- 1.6. ЭШ болон МХБШ-ыг 2022 онд тус бүр 2 удаа зохион байгуулна.
- 1.7. Шалгуулагч нь ЭШ-д монгол хэл, англи хэл, орос хэл, математик, физик, хими, биологи, газар зүй, түүх, нийгэм судлал хичээлүүдээс 2 ба түүнээс дээш хичээлийг сонгоно.
- 1.8. ЭШ-ын сэдэв даалгаврыг энэхүү журмын 1.7-д заасан хичээлийн сургалтын хөтөлбөрийн заавал судлах агуулгын хүрээнд шалгуулагчийн мэдлэг, чадварыг үнэлэхээр боловсруулсан байна.
- 1.9. ЭШ-ын монгол хэл, англи хэл, орос хэлний шалгалтын агуулгад сонсоод ойлгох чадварыг шалгах даалгаврууд орж болно.
- 1.10. ЭШ-ын монгол хэлний хичээлийн шалгалтын агуулгын 25 хувь нь үндэсний бичгийн мэдлэг, чадвар сорьсон даалгавар байна.
- 1.11. МХБШ нь монгол хэл, үндэсний бичгийн хэрэглээний чадвар сорьсон сонгох болон задгай хэлбэрийн даалгавраас бүрдэнэ.
- 1.12. Зарим хичээлийн сэдэв, даалгаврын тавил, агуулгын тохирцыг тандах зорилгоор шалгуулагчийн дүн оноо, шалгалтын үндсэн цагт нөлөөлөхгүй байдлаар туршин шинжилж болно.
- 1.13. ЭШ-ын хичээл бурийн шалгалтын сэдэв даалгаврыг Боловсролын үнэлгээний төв /цаашид БҮТ гэх/-ийн даалгаврын санг ашиглан блюпринтийн аргачлалаар жил бүр шинээр боловсруулсан бэлтгэнэ.

1.14. ЭЕШ-ын ерөнхий блюпринтийг жил бүр шинээр боловсруулан олон нийтэд хүргэнэ.

1.15. МХБШ болон ЭЕШ нь сонгон авсан их, дээд сургууль болон Ерөнхий боловсролын сургуулийн хичээлийн анги танхим, сургалтын байр /цаашид шалгалтын байр гэх/-нд явагдана. Мөн шалгалт авах, шалгалтын материал засах, оноожуулах явцын бодит чанар, ил тод байдлыг хангах зорилгоор шалгалтын байранд шууд засалтын танхим бэлтгэх ба хяналтын дуран, сонсгох төхөөрөмж, сүлжээ сарниулагч, металл илрүүлэгч, засагч машин, шууд дамжуулалтын төхөөрөмж гэх мэт шаардлагатай тоног төхөөрөмж ашиглана.

1.16. Шалгалтын талаарх шаардлагатай мэдээллийг тухай бүрт нь хэвлэл мэдээллийн хэрэгсэл болон “Элсэгчийн сонин”, www.eec.mn, stat.eec.mn, help.eec.mn цахим хуудас, <https://www.facebook.com/eec.mn/> page хуудас, гар утасны ЕЕС аппликацийн, шалгуулагчийн и-мэйлээр олон нийтэд хүргэнэ.

1.17. ЭЕШ болон МХБШ-ын сэдэв даалгавар бэлтгэх, хувилах, хүргүүлэх, шалгалтын материалыг төвлөрүүлэн татах, засах, үнэлэхтэй холбоотой нууцлалыг БҮТ хариуцна.

Хоёр. ЭЕШ-ын бүртгэл

2.1 ЭЕШ болон МХБШ-ын шалгуулагчдын онлайн бүртгэлийг www.eec.mn/ цахим хуудсаар БҮТ-өөс зарласан хугацаанд зохион байгуулна. Бүртгэлийн хугацаа болон цагийг сунгахгүй ба нэмэлт бүртгэл хийхгүй.

2.2 Онлайнаар бүртгүүлэхтэй холбоотой бүртгэлийн зааврыг энэхүү журмын 1.16-д заасан мэдээллийн эх сурвалжаас авч болно.

2.3 Шалгуулагч бүртгүүлэхдээ дараах материалыг бэлтгэсэн байна. Үүнд:

2.3.1 Цахим үнэмлэх болон түүнтэй адилтгах баримт бичиг /иргэний үнэмлэхний лавлагаа, гадаад паспорт, цагдаагийн үнэмлэх, мөн гадаадын иргэний Монгол Улсад оршин суух тур үнэмлэх /

2.3.2 Өнгөт цээж зураг файлаар /цээж зураг нь 3*4 хэмжээтэй, сүүлийн 3 сарын дотор авхуулсан, урагшaa цэх харсан, арын фон нь цайвар цулгүй өнгийн, нарны шил болон малгайгүй байна/

2.3.3 Бүх банкны интернэт гүйлгээ хийх эрхтэй төлбөрийн карт

2.3.4 Шалгуулагч бүр зөвхөн өөрийн и-мэйл хаягаар бүртгүүлнэ.

2.4 Өмнөх онд төгссөн шалгуулагч шалгалт өгөх аймаг /хот/-аа өөрөө сонгож бүртгүүлнэ.

2.5 Бүртгэл баталгаажсанаас хойш шалгуулагчийн овог, нэр Улсын бүртгэлийн ерөнхий газрын бүртгэлд солигдсон бол шалгуулагч www.eec.mn цахим хуудасны “шалгуулагчийн булан”-аар орж “зөвшөөрөх” товчлуур дарж баталгаажуулна.

2.6 Энэ онд төгсөж буй шалгуулагч сургууль, анги, бүлэг, регистрийн дугаар зөрүүтэй бол сурч буй сургуулийн сургалтын алба /сургалтын менежер/-аар дамжуулан БШУЯ-ны боловсролын салбарын мэдээллийн систем esis.edu.mn-д мэдээллийг засварласны дараа шалгуулагч www.eec.mn цахим хуудасны “шалгуулагчийн булан”-аар орж “зөвшөөрөх” товчлуур дарж баталгаажуулна.

2.7 Гадаад улс оронд бүрэн дунд боловсрол буюу түүнээс дээш боловсрол эзэмшсэн иргэн шалгалтад бүртгүүлэхдээ бүрэн дунд боловсрол эзэмшсэнийг гэрчлэх бичиг баримтыг БШУЯ-аар баталгаажуулж, БҮТ-д ирж бүртгүүлнэ.

2.8 Хөгжлийн бэрхшээлтэй болон тусгай сургуулийн суралцагчид ЭЕШ-д хамрагдахаар бүртгүүлсэн бол холбогдох бичиг баримтыг бүртгэлийн хугацаанд БҮТ-д ирүүлнэ.

2.9 Шалгуулагч нь бүртгүүлсэн утасны дугаараа ашиглан 133233 тусгай дугаараас өөрийн мэдээллийг SMS үйлчилгээгээр авах боломжтой. /нууц дугаар, бүртгэлийн дугаар, шалгалтын хуваарь, суудлын хуваарь, дүнгийн мэдээлэл/

2.10 Шалгуулагч бүртгэлийн хугацаанд бүртгэлийн дугаар, нууц үгээ ашиглан www.eec.mn цахим хуудасны “шалгуулагчийн булан”-д нэвтэрч шалгалт өгөх хичээлээ нэмж болно. Сонгож баталгаажуулсан хичээлийг хасах болон солих боломжгүй.

2.11 ЭЕШ-ын нэг хичээлийн бүртгэлийн хураамж 5800 төгрөг, МХБШ хураамжгүй байна.

2.12 Шалгуулагч шалгалтын хураамжийг аль ч арилжааны банкны интернэт гүйлгээний эрхтэй төлбөрийн карт болон Qpay үйлчилгээг ашиглан шилжүүлнэ.

2.13 Шалгуулагч бүртгэлээ цуцлан шалгалтын хураамжийг эргүүлэн олгох тохиолдолд тухайн шалгуулагчийн өргөдөл, төлбөр төлсөн хуулга /банкны теллерийн тамгатай/ шалгуулагчийн бичиг баримтыг үндэслэн олгоно. /бүртгэлийн хугацаанд/ Бүртгэл дууссаны дараа ямар нэгэн шалгаанаар шалгалтад ороогүй тохиолдолд шалгалтын хураамжийг эргүүлэн олгохгүй, бусдад шилжүүлэн тооцохгүй.

2.14 Шалгуулагч бүртгүүлэх явцад төлбөрийн гүйлгээг давхардуулж хийсэн тохиолдолд бүртгэлийн хугацаанд болон бүртгэл дууссанаас хойш ажлын 10 хоногийн дотор БҮТ-д хандаж төлбөрийн буцаалт хийх тухай хүсэлт гаргаж болно.

2.15 Энэ онд Ерөнхий боловсролын сургууль төгсч буй бүртгүүлэгч www.eec.mn цахим хуудасны “шалгуулагчийн булан”-аас QR код бүхий “бүртгэлийн хуудас”-аа хэвлэн авч сургуулийн захирлаар гарын үсэг зуруулан, тамга даруулж баталгаажуулна. Харин өмнөх онд төгссөн шалгуулагчийн “бүртгэлийн хуудас” нь QR кодоор баталгаажсан байх ба шууд хэвлэн авна.

Гурав. Шалгалтын хугацаа, зохион байгуулалт

3.1 Аймаг, нийслэл (сум, дүүрэг)-ийн шалгалтын байранд БҮТ-өөс томилсон шалгалт зохион байгуулах комисс ажиллах ба батлагдсан удирдамжийн дагуу шалгалтыг зохион байгуулна.

3.2 Шалгуулагч өөрийн бүртгэлийн дугаар болон нууц үгийг ашиглан “суудлын хуваарь”-аа www.eec.mn цахим хуудасны “шалгуулагчийн булан”-аас хэвлэн авна. Суудлын хуваарь хэвлэн авах хугацааг хэвлэл, олон нийтийн мэдээллийн хэрэгсэл болон www.eec.mn, Боловсролын үнэлгээний төвийн пэйж хуудсаар зарлана.

3.3 Тусгай хэрэгцээ шаардлагатай шалгуулагчийн ирүүлсэн өргөдөл, хүсэлт, эмчийн магадлагаа тодорхойлолт, сургуулийн албан бичигт үндэслэн шалгалтын анги танхим, шалгалтын материалыг тусгайлан бэлтгэнэ.

3.4 Шалгуулагчид шалгалт өгөхөөр ирэхдээ дараах материалыг бүрдүүлсэн байна.Үүнд:

3.4.1 Бүртгэлийн хуудас

3.4.2 Суудлын хуваарь

3.4.3 Цахим үнэмлэх болон түүнтэй адилтгах баримт бичиг /Цахим үнэмлэх авах насанд хүрээгүй буюу 2022 оны 06 дугаар сарын 01-ний өдрөөс хойш 16 насанд хүрэх шалгуулагч сурч буй сургуулийн захирал эсвэл өөрийн оршин сууж буй орон нутгийн Засаг даргын гарын үсэг, тамгаар баталгаажсан, сүүлийн 3 сарын дотор авхуулсан өнгөт цээж зурагтай тодорхойлолт, төрсний гэрчилгээний хамт авч ирнэ./

3.4.4 Бүрэн дунд боловсролын үнэмлэх, түүнээс дээш боловсрол эзэмшсэнийг гэрчлэх баримт бичиг

3.5 ЭЕШ болон МХБШ-ын хуваарийг БШУЯ-тай зөвшилцэн БҮТ зарлах бөгөөд шалгалтыг орон даяар Улаанбаатар хотын цагаар нэгэн зэрэг зохион байгуулна.

3.6 Шалгуулагч шалгалтын байранд суудлын хуваарьт заасан хугацаанд ирсэн байх шаардлагатай бөгөөд хуваарилагдсан нэвтрэх хэсгээр дамжин шалгалт өгөх анги, танхимд орж, 10 минутын өмнө суудлаа эзэлсэн байна. Дурдсан хугацаанаас хожимдсон шалгуулагчийг шалгалтад оруулахгүй.

3.7 Коронавируст халдвартын шинж тэмдэг илэрсэн, халуурсан, ханиалгасан шалгуулагчийг тусгай бэлтгэсэн анги танхимд оруулан, шалгалтыг зохион байгуулна.

3.8 Шалгалтын анги танхимд гар утас, тооны машин, таблиц, томьёоны хураангуй, ном, дэвтэр, ноорог цаас, гарын авлага, цаасан болон электрон толь бичиг, компьютер, таблет, ухаалаг цаг, дуу хураагуур, чихэвч зэрэг бусдад саад болох, хууран мэхлэх зорилготой ямар нэг зүйлийг авч орохыг хориглоно.

3.9 МХБШ болон ЭЕШ-ын математик, физик, химийн хичээлийн даалгавар гүйцэтгэх хугацаа 100 минут, монгол хэл, англи хэл, орос хэл, биологи, газарзүй, түүх, нийгэм судлал хичээлийн даалгавар гүйцэтгэх хугацаа 80 минут байна.

3.10 Хариултын хуудсыг санамжийн дагуу БҮТ-өөс тавьж олгосон балын харандаагаар тод засваргүй бөглөнө.

3.11 МХБШ-ын задгай хэлбэрийн даалгаврыг шалгалтын дэвтэр дээр хөх, цэнхэр өнгийн үзгэн болон тосон балаар гүйцэтгэнэ.

3.12 Шалгалтын дэвтэр ба хариултын хуудас /цаашид шалгалтын материал гэх/-ыг тарааснаас хойш шалгалтын анги танхимд зөвшөөрөгдсөн эрх бүхий хүнээс бусад хүн орж, гарахыг хориглоно.

3.13 Шалгуулагч эрүүл мэндийн байдлаас болон хүндэтгэн үзэх бусад шалтгаанаар шалгалтын анги, танхимаас гарсан бол шалгуулагчийн гарах хүртлээ хийсэн даалгаврыг дүгнэж зохих оноог өгнө.

3.14 Шалгуулагч хянагч багшийн зааврын дагуу баганан кодыг наана. Шалгалт зохион байгуулах комиссын гишүүд шалгалтын материалыг шалгуулагчдын өмнө тусгайлан бэлтгэсэн дугтуйд хийж битүүмжилнэ.

3.15 Шалгалтын материалыг БҮТ-д төвлөрүүлэн татаж, хадгална.

Дөрөв. Шалгалтын дүн мэдээ

4.1 Шалгалтын хугацаа дуусмагц, тусгайлан бэлтгэсэн шууд засалтын байранд тухайн шалгалтын хариултын хуудсыг шалгагч машинаар уншуулж, анхны оноог шууд мэдээлнэ.

4.2 Шалгалтын хэмжээст оноог тухайн шалгалтыг зохион байгуулснаас хойш 24 цагийн дотор www.eec.mn цахим хаягийн "шалгуулагчийн булан"-д байршуулна.

4.3 ЭЕШ-ын дүн онооны жагсаалтыг бүх шалгалтыг зохион байгуулснаас хойш 24 цагийн дотор www.eec.mn цахим хуудсанд байршуулан нийтэд зарлана.

4.4 МХБШ-ын дүн оноог шалгалт зохион байгуулснаас хойш 10 хоногийн дотор www.eec.mn цахим хуудсанд байршуулан нийтэд зарлана.

4.5 МХБШ болон ЭЕШ-ын дүн оноо бүхий батламж хуудсыг www.eec.mn болон E-mongolia.mn цахим үйлчилгээний нэгдсэн порталд байршуулах ба дүн онооны жагсаалт зарласнаас хойш шалгуулагч өөрөө хэвлэж авна.

4.6 ЭЕШ болон МХБШ-ын батламж хуудас нь шалгалт өгснөөс хойш 2.5 жил /30 сар/-ийн хугацаанд хүчин төгөлдөр байна.

4.7 Хүчинтэй хугацаа нь дуусгавар болсон батламж хуудас /дүнгийн тодорхойлолт/ нь их, дээд сургуульд элсэх үндэслэл болохгүй бөгөөд үүнтэй холбоотой хариуцлагыг БҮТ хүлээхгүй.

Тав. Олон улсын шалгалтын үнэлгээг ЭЕШ-ын үнэлгээнд дүйцүүлэх

5.1 Олон улсын шалгалтын үнэлгээг Монгол улсын ЭЕШ-ын үнэлгээнд дүйцүүлэх хүсэлтээ www.eyesh.eec.mn хаягаар ирүүлнэ.

5.2 Олон улсын хөтөлбөрөөр хичээллэн ерөнхий боловсролын сургууль төгсөгч нь олон улсын шалгалтын үнэлгээгээ ЭЕШ-ын үнэлгээнд дүйцүүлэх эсвэл ЭЕШ-д хамрагдаж үнэлүүлэхийн аль нэгийг сонгоно.

5.3 Олон улсын шалгалтын үнэлгээг ЭЕШ-ын үнэлгээнд дүйцүүлэхдээ сүүлийн 1,5 жилийн дотор олгогдсон олон улсын шалгалтын сертификат, дүнгийн хуудсыг үндэслэнэ.

5.4 Олон улсын шалгалтын үнэлгээг шалгалт өгсөн жилийн ЭЕШ-ын харгалзах хичээлийн үнэлгээтэй дүйцүүлнэ.

5.5 Олон улсын шалгалтын үнэлгээг ЭЕШ-ын үнэлгээтэй дүйцүүлэх хүсэлтийг тухайн жилийн ЭЕШ эхлэхээс хамгийн багадаа 14 хоногоос өмнөх хугацаанд дараах материалыг ирүүлж шийдвэрлүүлсэн байна. Үүнд:

5.5.1 Үнэлгээ дүйцүүлэх тухай хүсэлт

5.5.2 Төрсний гэрчилгээ эсвэл иргэний үнэмлэхийн хуулбар

5.5.3 Үнэлгээнд дүйцүүлэх хөтөлбөрийн сертификат, дүнгийн хуудсын хуулбар

5.5.4 Бүрэн дунд боловсролын гэрчилгээний хуулбар эсвэл гадаадад бүрэн дунд боловсрол эзэмшсэнийг гэрчлэх дүйцүүлсэн баримт

5.5.5 Тухайн сургуулийг сурч төгссөн тухай сургуулийн тодорхойлолт

5.5.6 Өнгөт цээж зураг файлаар /цээж зураг нь 3*4 хэмжээтэй, сүүлийн 3 сарын дотор авхуулсан, урагшаа цэх харсан, арын фон нь цайвар цулгүй өнгийн, нарны шил болон малгайгүй байна/

5.6 Үнэлгээ дүйцүүлэх хүсэлтээ БҮТ-д гаргах ба хүсэлт хүлээн авсан өдрөөс хойш ажлын 5 хоногт багтаан дүйцүүлсэн батламж хуудсыг олгоно.

5.7 Дүйцүүлсэн батламж хуудас нь олон улсын шалгалтад хамрагдаж, сертификат, гэрчилгээ авсан өдрөөс хойш 2,5 жилийн хугацаанд хүчинтэй байна.

5.8 Хүсэлт ирүүлж дүйцүүлсэн үнэлгээг ЭЕШ-ын үндсэн жагсаалтад оруулахгүй ба харгалзах хичээлийн жагсаалтад онооны дагуу тусад нь жагсаалт үүсгэн байршуулж БҮТ-өөс дээд боловсролын сургалтын байгууллагад хүргэнэ.

5.9 Олон улсын шалгалтын үнэлгээг ЭЕШ-ын үнэлгээтэй дүйцүүлэх хүсэлт гаргасан иргэн дүйцүүлсэн үнэлгээнд хамрагдаагүй хичээлүүдээр ЭЕШ өгч болно.

Зургаа. ЭЕШ-ын өргөдөл, гомдол хүлээн авах, шийдвэрлэх

6.1 ЭЕШ болон МХБШ-ын явц, зохион байгуулалт, шалгалтын материал, дүн оноотой холбоотойгоор иргэдээс ирүүлсэн өргөдөл, гомдлыг шийдвэрлэх 5-7 хүний бүрэлдэхүүнтэй комисс БҮТ-ийн захирлын тушаалаар томилогдон ажиллана.

6.2 Бүртгэл болон шалгуулагчийн хувийн мэдээлэлтэй холбоотой өргөдөл, гомдол, санал, хүсэлтийг бүртгэлийн хугацаанд БҮТ-ийн 70119498, 75779498 лавлах утас, info@eec.mn имэйл, <https://www.facebook.com/eec.mn/> цахим хуудсаар хүлээн авна. Мөн Улаанбаатар хот, Баянзүрх дүүрэг, 6-р хороо, Энхтайваны өргөн чөлөө, Оюуны Ундраа группийн байранд өөрийн биеэр, бичиг баримттайгаа ирж шийдвэрлүүлж болно.

6.3 Шалгалтын явц, зохион байгуулалттай холбоотой өргөдлийг бичгээр гаргаж, тухайн шалгалтын байранд томилогдон ажиллаж буй шалгалтын комисс асуудлыг шийдвэрлэнэ.

6.4 BYT шалгалтын материал, дүн оноотой холбоотой өргөдлийг шалгалт зохион байгуулж дууссанаас хойш ажлын 5 өдөрт багтаан хүлээн авч, хуулийн хугацаанд шийдвэрлэнэ.

6.5 Шалгуулагчийн буруутай үйлдлээс шалтгаалсан зөрчилтэй холбоотой өргөдлийг хүлээн авч шийдвэрлэх боломжгүй бөгөөд шалтгаанаа тодорхой заагаагүй болон буцах хаяггүй өргөдлийг хүлээн авахгүй болно.

Долоо. Журам зөрчигчдөд хүлээлгэх хариуцлага

7.1 Бүртгүүлэхдээ бусдын данс, гүйлгээний картын мэдээллийг хууль бусаар ашиглан гүйлгээ хийсэн нь иргэний гомдоор тогтоогдсон тохиолдолд тухайн шалгуулагчийг шалгалтад оруулахгүй.

7.2 Энэхүү журмын 3.6-д заасан хугацаа (цаг, минут)-аас хоцорсон болон мөн журмын 3.8-д заасан баримт бичиг бүрдүүлээгүй, хувийн мэдээлэл зөрүүтэй шалгуулагчийг шалгалтад оруулахгүй.

7.3 Шалгуулагч шалгалтын даалгаврыг гүйцэтгэхдээ бусдаас дэмжлэг авсан, энэхүү журмын 3.10-д хориглосон зүйлийг ашигласан, бусдад тусалсан, бусдаас тусlamж авсан, хоорондоо ярилцах зэргээр бусдад саад учруулсан бол шалгалтын журам зөрчсөнд тооцож, тухайн шалгалтын материалыг хүчингүй болгоно.

7.4 Шалгалтад өөрийнхөө оронд хүн оруулсан, бичиг баримтыг хуурамчаар үйлдэн хууран мэхлэхийг оролдсон тохиолдолд тухайн шалгуулагчийн бүртгүүлсэн болон өгсөн бүх шалгалтын дүн оноог хүчингүй болгоно.

7.5 Иргэн, хуулийн этгээд нь шалгуулагчийг хууль бус үйлдэл гаргахад дэмжлэг үзүүлсэн, үгсэн хуйвалдсан, нуун дарагдуулсан эсвэл шалгалтын бэлтгэл болон явц, дүн оноотой холбоотой санаатай болон санамсаргүй үйлдэл, эс үйлдэхүйгээр хэвлэл мэдээлэл, цахим сүлжээгээр худал мэдээлэл тарааж байгууллагын хуулиар хамгаалагдсан ашиг сонирхолд гэм хор учруулсан бол цагдаагийн байгууллагад шилжүүлэн шалгуулж хуульд заасан хариуцлага хүлээлгэнэ.

7.6 Шалгалтад бүртгүүлэх, шалгалтад ороход шаардлагатай болон шалгалтын дүн оноотой холбоотой бичиг баримтыг шалгуулагч хуурамчаар үйлдсэн нь нотлогдсон тохиолдолд холбогдох хуулийн хариуцлага хүлээлгэнэ.

Найм. Бусад

8.1 BYT нь зохион байгуулсан шалгалтын дүн, оноо, тайлан, үр дүнг олон нийт, боловсролын үйлчилгээ үзүүлэгч байгууллага, судлаачдад www.eec.mn, www.stat.eec.mn цахим системээр болон хэвлэмэл байдлаар хүргэнэ.

8.2 Шалгалтын үр дүнгийн талаарх мэдээлэл авах хүсэлтээ тухайн байгууллага албан бичгээр BYT-д ирүүлнэ. BYT нь бүх шатны боловсролын болон судалгаа шинжилгээний байгууллагад шалгуулагчдын статистик дүн мэдээ, шалгалтын хичээл тус бүрийн дундаж дүн оноог гаргаж өгч болно.

8.3 Энэхүү журмыг BYT-ийн захирлын тушаалаар батлагдсан өдрөөс эхлэн ЭЕШ-ын үйл ажиллагаанд дагаж мөрдөнө.

8.4 BYT-ийн захирлын тушаалаар журамд нэмэлт, өөрчлөлт оруулж болно.